

弇州山人續稿卷之一百六十三

吳郡王世貞元美著

文部

墨蹟跋

國朝名賢遺墨五卷

右有明名賢遺墨第一卷二十人故翰林學士承旨
太子贊善大夫金華宋文憲公濂以文學佐內秉爲
一世宗匠而所與徐大章書脩謹甚筆法尤適密可
愛楊鐵籛先生維禎七言律一章句句使事雖勁麗
而不穩妥書筆却道逸足稱散僧入聖先生會稽人

元儒學提舉也不肯食

明祿以其嘗預史局且卒

於洪武八年故收之胡仲申先生翰亦金華人以郡
教授終其名在宋文憲王忠文間此書亦貽徐大章
者頗極推許之致張羽潯陽人以太常寺丞不良死
所作雪樵傳事與文皆清逸而隸法則韓擇木派也
王達無錫人革除靖難間兩爲翰林院學士折簡一
僧謂徐殿下尚未授職得非謂中山王少子膺緒乎
亦以見當時稱謂如此解公縉一名縉紳吉水人初
建內閣爲首臣以左春坊大學士兼翰林院學士出
叅議交趾下獄死此六絕句懷南宮舊游作也時時

見才情筆勢尤邁俊然墨氣勝而結構小疎從子禎
期臨右軍一札家雞宛然而換驚意遠矣禎期初以
學士累成遼左後赦之爲中書舍人七十餘尚供奉
史局胡文穆公廣題漁父辭劍圖記以舟子辭金事
倭之蓋謂子胥宋瑞畧相當而舟子漁父其節俠同
而史佚之以爲恨然文穆拈筆時恐不能無色添也
公廬陵人建文中狀元及第累官文淵閣大學士翰
林院學士贈禮部尚書再贈少師楊文貞公士奇贈
東莞丞一律一絕句勁筆紛披與語俱老公初名寓
以字行亦廬陵人累官少師兵部尚書華蓋殿大學

士贈太師名位器業一時名臣也胡頤庵先生儼南
昌人以國子祭酒兼翰林侍講進太子賓客致仕楊
文敏公榮建安人以少師工部尚書謹身殿大學士
卒贈太師金文靖公幼孜初名善以字行臨川人也
爲太子少保戶部尚書武英殿大學士贈少保三公
同官內閣而同爲胡文穆題漁父圖其一爲古騷二
爲五言選調同書法小行楷亦同曾公榮梁公潛亦
題此圖則皆歌行而語皆勝曾書法尤自精雅可愛
亦吉水人也甲申狀元及第以少詹事兼侍讀學士
卒贈禮部左侍郎梁西昌人以右贊善佐東宮坐間

庚死李忠文公時勉凡二紙其一跋江母傳其一題
陶靖節度履圖公 人以國子祭酒致仕贈禮部

左侍郎初謚文毅忠文其改謚也清忠勁節風表百
世而結法乃婉媚而有致王文端公直泰和人文安
公英臨安人同舉進士改翰林歷史局官坊學士少
詹事禮部左侍郎典內制無弗同者海內稱爲二王
先生而其自侍郎以後名位恩寵始迥絕文安瞠乎
非埒矣今所送詩俱以初拜官遠地者其詩律筆意
乃又無不同也陳文定公敬宗與李忠文同爲祭酒
天下以南北師範稱之陳公爲祭酒十八年不遷卒

年八十有八其詩亦題昭關圖者小楷斐亶饒晉人意公之負臨池名固不虛也魏文靖公驥怡壽堂記爲吾郡華氏書者精緊有腕力公蕭山人以南京吏部尚書致仕卒年九十八眉壽爲我明文臣冠而行業亦稱是陳公璉挽李士文序詞翰俱清雅公東莞人爲四川按察使吏部言其文而不善憲紀顧得改南京通政使領國子祭酒後以禮部左侍郎終甚奇事也卷凡二十人二十一紙而江西獨得十之七云

第二卷錢文肅公習禮臨江人也四十餘入翰林以

禮部右侍郎致仕卒年八十九此蹟一輓章耳以公
品清貴故留之楊公翥吾郡人繇薦入翰林爲郕府
右長史郕王登極公老矣累進禮部尚書食祿不視
事卒年八十五所書梅軒記爲陳有成作有成故太
保僖敏公鑑弟也其辭翰皆頽然長者高文義公穀
楊之興化人以少保太子太傅工部尚書謹身殿太
學士兼東閣大學士致仕卒贈太保其叙余青陽集
毅然有解金帶贈王舍人疏廬陵東鹿氣而書法却
妍婉令人作留侯好女子觀于肅愍公謙錢塘人以
公保兼太子太傅兵部尚書中讒死贈太傅公精忠

大節載在國史此詩乃題黃子久江山萬里圖者以
不切於圖故割置此焉公愉臨朐人狀元及第以禮
部右侍郎兼翰林院侍講學士卒贈尚書張文僖公
益上元人以翰林侍講學士死土木難贈學士二公
皆登內閣不躋極品所題城南書屋詩爲戴文進筆
藏余家今留置於此徐天全有貞吾郡人初名瑅累
官華蓋殿大學士封武功伯削爵謫金齒放歸卒送
僧素菴住持宣府彌陀寺序乃少年書而中有塗乙
筆殊秀勁彌陀寺上谷名利也建於譚大將軍廣楊
東里先生嘗記之林學士文題張氏手澤記辭翰皆

質勝張之先適者吾郡人洪武中十才子也嘗仕工
部郎謫廣州宣課大使死學士閩人進士及第踰四
十年而尚滯五品其後僅加太常少卿致仕當時固
如是也商文毅公輅淳安人三舉第一人及第僅四
載入內閣又五年而至少司馬學士歸田僅十年復
召累進少保吏部尚書謹身殿大學士又十年而歸
歸又十年而卒贈太傅韓襄毅公雍吾郡人二十九
爲僉都御史撫江西後累進右都御史總兩廣諸軍
此二札皆與吾鄉練綱御史者韓公推賞獨至蓋以
才氣合也彭文憲公時安福人狀元及第之明年卽

入內閣旋出再入以少保吏部尚書文淵大學士卒
贈太師所書乃輓章而有高誼舊爲鄉里重直言曾
感帝王尊語得非爲李忠文作耶劉叅政先生昌吳
縣人弱冠登高第而官不甚達先生以博識名今題
宋江山簿推恩告身而疑其制不能攷何也太子太
保吏部尚書贈太師三原王端毅公恕報少保閔莊
懿公珪一札以惠書爲謝是時問遺可推已然筆頗
謹細不類北人恐佐史爲之以公名臣第一不敢不
存也太子太保兵部尚書贈太保青神余肅敏公子
俊一詩味其語似於嚴郡謁范文正祠作少師太子

太師吏部尚書華蓋殿大學士贈太師宜興徐文靖
公溥一詩則卷冊中長語也公弘治中首輔頗以寬
靖長者稱刑部尚書盱江何文肅公喬新與郁秋官
札乞琬琰集春秋纂言懇懇且云別後日益衰邁閒
中惟以經籍自娛而已楷法極謹細無一筆苟正與
志傳所載合太僕寺少卿長洲李公應禎初名牲生
平負氣有大節放舟一律亦得小致語此公以書名
初波拂間時露崛強殆類其爲人已翰林院檢討白
沙陳先生獻章大儒也然以一膺薦貢士作省臬書
而詞旨縱放又多潦倒筆半不成字且誤稱閔公爲

憲副而旁注一長字豈與閔契深不規規世法耶亦足以見爾時人之樸矣國子監祭酒永玉羅公璟以趨朝賜麵小詞寄陸鈇太常筆法頗欲學宋仲溫而未成長然當其時亦錚錚不知何故遠讓長沙禮部右侍郎領國子祭酒方石謝公鐸爲人作一詩不知何題而頗清雅其名位品裁卷首尾正得平無軒輊也卷亦二十人幘如之而吾郡稍稍有餘者

第三卷李文正公東陽二札書筆俱清麗而後札與倪公岳者然不稱同年或以館契重耳公長沙人隸燕中戎籍累官少師太子太師吏部尚書華蓋殿大

學士贈太師倪文毅公岳一札乃寄同年閔莊懿珪
者公時以宮保長留銓而閔公以宮保正中臺乃自
稱友生又不及閔別號亦可見爾時之朴也公後入
爲吏部尚書卒贈少保太常少卿兼侍讀陸春雨先
生弢哭用常一排律過亨父故宅一律翰林院脩撰
張滄洲先生泰哭子五絕句皆銷魂語也二公皆吾
州人皆負文學而皆不獲中壽以死其後皆凋落而
張尤甚用常不知何許人似是官乍顯而溺死亨父
卽張不知結韻劉後村相與何事太子太保兵部尚
書贈太保華容劉忠宣公大夏二札一與郁公卽前

卷所謂秋官者一則其子華容令華容令余外大王
父也都察院左都御史贈太子太保戴恭簡公珊一
札寄閔莊懿者二公皆

孝廟晝接賢臣想見其

時爲之慨羨屠襄惠公瀟在吏部數行要閔公出郊
過談且云有奇果一品未薦竟不知何物也公鄞人
以太子太傅尚書罷歸召領都察院卒贈太保禮部
侍郎兼侍講學士贈尚書新安程公敏政禮部尚書
贈太子太保常熟李文安公傑各有詩投吾州陸文
量而山莊二絕有味乎言矣文量名容吾州人有經
濟才以浙江左叅政中萋菲罷歸所舉德清道中語

真能引分自安者而罷未久以邑邑不樂疽發背卒
何也思玄子桑悅常熟人負才而躁爲柳州通判侘
僚失意故其語曰鷓鴣道我行不得杜宇勸人歸去
休又云投荒此日無言語不與宗元競柳州雖弘曠
不足而旨趣亦悲切矣書尤縱誕可惱海釣蕭顯山
海人按察僉事以病歸此君書名彷彿張南安而圉
圉未稱雪賦禁體復步險稱奇宜其都不成語也吳
文定公寬蓮溪輓章作蘇體極古雅咄咄逼真謝文
正公遷卷冊語耳王文恪公鑒與楊循吉一札有前
輩虛度而爲俗子蛇足一印章不能洗之文定長洲

人文恪吳邑人連舉壬辰乙未會元及第文正餘姚人則乙未狀元也吳至禮部尚書翰林院學士贈太子太保謝至戶部尚書謹身殿大學士王至戶部尚書武英殿大學士俱以少傅太子太傅贈太傅三公年位聲實伯仲也第文苑之績吳王居優清朝相業謝尤表表矣太子太保刑部尚書贈太保洪襄惠公

一札乃撫順天時致閔莊懿者少師太子太師火部尚書華蓋殿大學士贈太師順德梁文康公儲一詩乃宮坊時送王冬官者南京吏部尚書封新建伯餘姚王公華一札乃官諭時簡閔莊懿者閔時長